

VENDIM
Nr. 68, datë 10.5.2019

**MBI FILLIMIN E PROCEDURËS PËR MIRATIMIN E DRAFTKONTRATËS TIP
PËR SHITBLERJEN E ENERGJISË ELEKTRIKE NDËRMJET SHOQËRISË SË
PRODHIMIT TË ENERGJISË ELEKTRIKE/KESH SHA, AKSIONET E SË CILËS
KONTROLLOHEN PLOTËSISHT OSE PJESËRISHT NGA SHTETI DHE
FURNIZUESIT TË SHËRBIMIT UNIVERSAL/OSHEE SHA PËR PERIUDHËN
1.3.2019–31.12.2019**

Në mbështetje të neneve 16, dhe 20, germa “h”, të ligjit nr. 43/2015, “Për sektorin e energjisë elektrike”, i ndryshuar, nenit 104, pika 4, germa “a”, të ligjit nr. 44/2015, “Kodi i procedurës Administrative”, nenet 5 dhe 14, të VKM-së nr. 244, datë 30.3.2016, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, i ndryshuar, dhe nenit 26 të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s, nr. 96, datë 17.6.2016, bordi i ERE-s, në mbledhjen e tij të datës 10.5.2019, mbasi shqyrtoi relacionin e përgatitur nga drejtoritë teknike në lidhje me fillimin e procedurës “Për miratimin e draftkontratës tip për shitblerjen e energjisë elektrike ndërmjet shoqërisë së prodhimit të energjisë elektrike/KESH sh.a., aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal/OSHEE sh.a. për periudhën 1.3.2019–31.12.2019”.

konstatoi se:

- Me shkresën nr. 176/1 prot., datë 6.3.2019, ERE u ka kërkuar shoqërisë KESH sh.a., dhe OSHEE sh.a., duke venë në dijeni edhe Ministrinë e Infrastrukturës dhe Energjisë, të depozitojnë kontratën për shitblerjen e sasisë së tepërt të energjisë elektrike që rezulton pas përmbushjes së kërkesës së klientëve që përfitojnë nga shërbimi universal, me qëllim mbulimin e humbjeve në rrjetin e shpërndarjes për vitin 2019, si dhe kontratën tip për shitblerjen e energjisë elektrike ndërmjet shoqërisë së prodhimit të energjisë elektrike/KESH sh.a., aksionet e së cilës kontrollohen plotësisht ose pjesërisht nga shteti dhe furnizuesit e shërbimit universal, në të kundërt ERE do të vendosë mbi hyrjen në fuqi të kontratës pa miratimin e palëve, gjë që vendos palët para detyrimit për zbatimin e saj brenda një afati 30-ditor.

- Me vendimin e bordit të ERE-s nr. 16, datë 18.2.2019 u vendos për shtyrjen e afatit të zbatimit të kontratës për shitblerjen e sasisë së tepërt të energjisë elektrike që rezulton pas përmbushjes së kërkesës së klientëve që përfitojnë nga shërbimi universal, me qëllim mbulimin e humbjeve në rrjetin e shpërndarjes, miratuar me vendimin e ERE-s nr. 98, datë 30.4.2018, deri në paraqitjen e draftkontratës për vitin 2019 nga KESH sh.a. dhe OSHEE sh.a. dhe miratimin e saj nga ERE.

- Shoqëria KESH sh.a., në vijim të korrespondencës së sipërcituar, ka përcjellë në ERE shkresën me nr. 1287/1 prot., datë 13.3.2019, protokolluar me tonën me nr. 176/2 prot., datë 15.3.2019, draftkontratën mes KESH sh.a. dhe OSHEE sh.a. “Për shitblerjen e energjisë elektrike ndërmjet shoqërisë së prodhimit të energjisë elektrike KESH sh.a., aksionet e së cilës kontrollohen plotësisht ose pjesërisht nga shteti dhe furnizuesit e shërbimit universal, për furnizimin e klientëve fundorë, për periudhën kohore 1.3.2019–31.12.2019”. Në këtë shkresë, KESH sh.a. ka kërkuar komentet paraprake, me qëllim që palët të vijnë me nënshkrimin përfundimtar të marrëveshjes, e cila do përcillet për miratim pranë ERE-s.

- Në vijim të sa më sipër ERE në shkresën e saj me nr. 176/3 prot., datë 29.3.2019 bëri me dije se, do të japë opinionin gjatë procedurës së shqyrtimit të kontratës së nënshkruar dhe shpreh qëndrimin e saj me vendim. Gjithashtu lidhur me këtë kërkesë, ERE bëri me dije se: neni 5, pika 2, i

VKM-së me nr. 244, datë 30.6.2016 “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike” përcakton se: sasia e energjisë elektrike përcaktohet në kontratën e rregulluar ndërmjet palëve, që miratohet nga ERE, bazuar në një regjim shfrytëzimi të kapaciteteve gjeneruese dhe një nivel historik mesatar vjetor të prodhimit. Në këto kushte nuk është e nevojshme të pritet për komente/sugjerime të ERE-s për të vijuar më tej me lidhjen e kontratës ndërmjet KESH sh.a. dhe OSHEE sh.a.. ERE me anë të kësaj shkrese ka kërkuar që të procedohet me dërgimin e kontratës së dakordësuar dhe të nënshkruar mes palëve, që më pas ERE të vijojë me shqyrtimin dhe dhënien e opinionit nëpërmjet vendimmarrjes.

- Me shkresën nr. 1716/1, prot., datë 8.4.2019, e KESH sh.a. dhe OSHEE sh.a. protokolluar me tonën me nr. 176/4 prot., datë 8.4.2019, shoqëria KESH sh.a. dhe OSHEE sh.a., i kanë përcjellë ERE-s për miratim “Kontratën për shitblerjen e energjisë elektrike ndërmjet Shoqërisë së Prodhimit të Energjisë Elektrike/KESH sh.a., aksionet e së cilës kontrollohen plotësisht ose pjesërisht nga shteti dhe Furnizuesit të Shërbimit Universal/OSHEE sh.a. për periudhën 1.3.2019 – 31.12.2019” të nënshkruar nga KESH sh.a. dhe OSHEE sh.a.

- Kjo kontratë paraqitet e strukturuar nga 23 (njëzetë e tre) nene dhe një shtojcë e cila ka të bëjë me termat e përdorura në këtë kontratë. Pjesë integrale e kësaj kontrate është edhe aneksi 1, i cili nëpërmjet tabelës përkatëse përcakton parashikimin e prodhimit nga KESH sh.a. për periudhën janar-dhjetor 2019, programin ditor, javor dhe mujor të kërkesës së konsumatorëve fundorë për energjinë elektrike në (mwh).

- Sa i takon objektit për shqyrtimin me ERE-n, lidhur me sasinë e energjisë elektrike parashikuar për t’u prodhuar dhe lëvruar nga KESH sh.a. për OSHEE sh.a. /FSHU, me qëllim garantimin e furnizimit për klientët fundorë, do jetë vetëm sasia totale vjetore 3,950,000 MWh dhe jo të dhënat e tjera të paraqitura në tabelat e aneksit 1 të kësaj kontrate

- Sasia e energjisë elektrike, për qëllime të furnizimit të Furnizuesit të Shërbimit Universal, miratohet nga Asambleja e Përgjithshme e shoqërisë së prodhimit të ngarkuar me detyrimin e shërbimit publik, duke u bazuar në nivelin historik mesatar vjetor të dhjetë viteve të fundit, sipas informacionit të dhënë nga ERE dhe regjimit racional të shfrytëzimit të kapaciteteve gjeneruese.

- Ministri i Infrastrukturës dhe Energjisë (në cilësinë e përfaqësuesit të shtetit si pronar i aksioneve të KESH sh.a., në Asamblenë e Përgjithshme të shoqërisë) me vendimin nr. 14430/3, datë 19.12.2018 “Mbi miratimin e programit financiar të shoqërisë KESH sh.a. për vitin 2019” ka miratuar sasinë dhe çmimin e shitjes së energjisë elektrike për qëllime të furnizimit të Furnizuesit të Shërbimit Universal në kuadër të detyrimit për shërbim publik.

- Nga shqyrtimi paraprak i draftit konstatojmë se:

- Palët kanë të drejtë të paraqesin për miratim në bordin e ERE-s këtë kontratë,

- Kontrata e paraqitur për miratim, është e dakordësuar dhe e nënshkruar nga të dyja palët,

- Kontrata ka dispozita të reja, krahasuar me kontratën në fuqi, shtyrë më vendimin e bordit të ERE nr. 16 datë, datë 18.2.2019,

- Palët duhet të japin shpjegime në lidhje me përputhshmërinë e kësaj kontrate me dispozitat e VKM nr. 244, datë 30.3.2016 “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”.

Për gjithë sa më sipër bordi i ERE-s:

VENDOSI:

1. Fillimin e procedurës për miratimin e draftkontratës tip për shitblerjen e energjisë elektrike ndërmjet shoqërisë së prodhimit të energjisë elektrike/KESH sh.a., aksionet e së cilës kontrollohen plotësisht ose pjesërisht nga shteti dhe Furnizuesi i Shërbimit Universal/OSHEE sh.a. për periudhën 1.3.2019–31.12.2019.

2. Shoqëritë KESH sh.a. dhe OSHEE sh.a. të paraqesin në ERE, relacion shpjegues në lidhje me dispozitat e reja të kësaj kontrate krahasuar me atë në fuqi, duke mbajtur në konsideratë, përputhshmërinë me VKM nr. 244/2016, ruajtjen e standardit të kontratave tip të miratuara nga ERE, si dhe qëndrimin e Ministrisë së Infrastrukturës dhe Energjisë (MIE).

3. Drejtoria Juridike dhe e Mbrojtjes së Konsumatorit të njoftojë shoqëritë OSHEE sh.a., KESH sh.a., dhe MIE për vendimin e bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti